

HOOTERS TA UN RESTAURANT ESTILO FAMILIAR Y DEN AMBIENTE DI BEACH

ORANJESTAD (AAN): Riba Sasakiweg construccin ta kedando cla cu e restaurant di mas nobo na Aruba, esta "Hooters". E lo ta habiendo Dialuna awor cu un fiesta oficial pa invitado y VIP.



E cadena di restaurantnan Hooters a cuminsa como 13 aña pasa na Clearwater, Florida. E idea di e empresarionan tabata pa bin cu un lugar unda tin bon cuminda, estilo fast-food y sirbi den un ambiente di beach, unda hende por reuni y pasa pret combersando y disfrutando di e lugar.

Esey ta principalmente e meta cu restaurantnan Hooters tin. E empleadonan ta usa e mesun tipo di uniform cu e cadena Hooters a cuminsa cune for di prome dia di apertura, cu ta short oranje y tanktop blanco.

Ta asina cu un "Hooters girl" ta un persona joven, yen di 'fun', y mayoria vez nan ta personanan cu ta atendiendo college, of ta profesional, cu ta traha full of parttime, y di e forma ey ta ta pasa momentonan pret y topa hendenan interesante.

"Un 'Hooter Girl' ta mescos cu e muchanan di Radio City Hall Rockettes, of e Cheerleadernan di Dallas Cowboys, y ta bon conoci pa nan modelahe di Sports Illustrated Swimsuit Issue." Esey ta loke Tom Avallone di Hooters Aruba a declara den un entrevista cu DIARIO.

El a splica cu na mundo aworaki, tin como 10.000 Hooter Girls, kendenan ademas di ta traha den e restaurant, sa haci presentacionnan pa diferente actividad, manera presenta nan mes den festival, actividadnan di comunidad, reunion, y hasta nan ta aparece riba 'trading-



Tom Avallone ta sumamente contento cu Aruba ta e prome den Caribe Hulandes pa tin su Hooters Restaurant.

cards' y riba calender.

Segun Avallone, tin como 190 y pico Hooters Restaurant rond mundo. Na December mes cu a pasa a habri uno na Singapore, y mesora el a bira uno exitoso.

"Aruba ta e prome cu ta haya un Hooters den Caribe Hulandes," Avallone a splica. "E tin espacio pa 270 hende, cu un cushina full habri pa e publico mira con nan ta prepara e cuminda, y nos lo ta bende entre otro seafood, burgers, chicken-wings, sandwiches." El a subraya cu Hooters ta mas conoci pa nan chickenwings y shrimp.

FAMILY-STYLE RESTAURANT

Mester indica tambe cu Hooters ta un "Family-Style Restaurant", caminda famia completo por bin disfruta di delicioso plato, den un ambiente great y fabuloso.

"Nos no ta un bar di 'hard-liquor'," Avallone a splica. El a muestra cu nan ta dedica nan mes pa sirbi famia, of cualkier persona cu kier disfruta di un cuminda sirbi den ambiente di beach.

E bebidanan alcoholico cu nan lo ta bende ta cerveza y biña. Pero lo no tin alcohol sterki. Pa e muchanan, nan a prepara tambe nan Kid's

Menu.

Hooters ta un 'franchise' Mericano cu tin su standard y reglanan estricto pa traha cune. Avallone a muestra cu den pasado e compania lo por a haci error, pero awor cu tur e standardnan aki casi no por tin eror mas.

Ademas di su cuminda, Hooters ta conoci tambe pa su souvenirnan. Pesey lo bay tin un giftshop pa bende articulonan di Hooters, manera glas, mugs, como tambe bala di golf, calender. Enfin e mercancia ta extenso.

HOPI HENDE A SOLICITA

Segun Tom Avallone, e reaccion di publico tabata tremendo. Un cantidad di mucha muhernan Arubiano a solicita, y esaki ta varia for di personanan cu ta estudiante ainda, te cu esnan cu kier traha full-time.

Tin mucha muher cu a caba di yega Aruba despues di a biba na Hulanda, y nan tur tin hopi animo pa traha den un restaurant prestigioso asina. Tambe a tuma mucha muhernan for di otro lugarnan. Loke mas ta impresionan nan ta e standard y reglamentonan estricto cu ta existi, y e entrenamiento pisa cu nan ta hayando.

DIARIO a compronde cu

como 50 mucha muher a haya trabao. Algun ta mama, otro ta estudiante, y otro nan ta full-time.

E uniform di e waitress ta basicamente loke bo ta bisti pa bay un fiesta riba beach. Nan ta waitress y ta ricibiendo un cantidad grandi di training. Segun Avallone, tin un training-crew cu a bin Aruba pa 3 siman pa siña nan con pa anda cu e forma tradicional di servicio di Hooters.

E team ta yuda cada uno individualmente, pa asina sigura cu Hooters di Aruba ta keda mantene e standard di corporate headquarters, y principalmente pa nan ta un restaurant pa sirbi famia como debe ser.

TRAHANDO NAN PROPIO CERVEZ

Na e parti mas patras di Hooters lo tin un cervceria pa traha cerveza eynan mes. E asina yama "Microbrewery" ta uno separa di Hooters, pero tin bentananan grandi pa tur hende mira e proceso di traha cerveza.

DIARIO a compronde cu "Aruba Brewing Company" lo cuminsa produccion pronto. E bishitantenan lo por mira con ta traha cerveza, por haya un tour di e brewery, y purba e cerveza directamente

for di e tanki.

E cerveza aki ta puro y fresco, y lo ser sirbi unicamente den Hooters.

APERTURA OFICIAL

Tom Avallone a splica DIARIO, cu hopi di e Vice-Presidentenan di Hooters di Merca ta yegando Aruba pa asina presencia e apertura.

Director di Operacion di Hooters na Aruba ta Tom Avallone. Management ta den man di Eric Malmberg, Morris Figaroa, y Vivian de Cuba. Nan tur a bay Hooters University na Atlanta, Georgia, pa dos luna di entrenamiento extenso.

Den Hooters, nan lo toca musica di "50's and 60's", lo tin tema di Sportsbar, un ambiente di beach, piso di hardwood, y muraya rustico. E ta casual y comfortable.

Nan lo ta habri pa lunch y dinner, siete dia pa siman.

Como tradicion di Hooters, semper nan kier pa tin un instancia caritativo reconoci pa nan duna cierto donacion.

Pa tal motibo, pa e fiesta di VIP di Dialuna venidero, propietarionan ta pidi e invitatadonan pa bin cu un suma pa entree como donacion. E fundacion cu lo ricibi esaki ta Stichting Edmund E. Harms.